

GJITE INTE LAGUNE DI GRAO

Martars , 5 di Març, nô fruts di cuarte, insiemit a duçj chei altris di Percût, o sin stâs in gjite e si sin divertîs tant. Par cheste resòn o vin pensât di contaus ce che o vin viodût.

O sin partîs a buinore, in coriere, e a lis nûf o jerin za pronts denant de motonâf, in file indiane cun dutis lis intenziòns di montâ su. Nol è stât tant di spetâ, in pôc timp o jerin in cime al traghèt a cjalâ la lagune di Grao.

O podaresis fanus des domandis a ûs di chestis:


CE ISE LA LAGUNE DI GRAO?

DULÁ SESO STÂS?

Us contentin a colp!

La guide nus à dit che tant timp fa lì al jere un flum che al à puartât tiere e savalon e il mâr al à ingrumât dut, podopo il flum si è spostât e al à lasât aghe e pantan.

Nô o sin stâs chi.



La guide nus à spiegât:

"La lagune a jere un spieli di aghe calme e pôc profonde parcè a jè riparade dal lît, un cordon di isulutis di savalon.

O podês viodi lis bariduris che son isulis che cuasi simpri a stan fûr de aghe. Lis velmis invezit a son splatz di pantan che a vegnin fûr dome cu la basse maree.

Lis mareis, jentrànt e lant fûr de lagune, e àn scavât i fondai e formât i canai, là che nô o podìn navigâ. I canai a son segnâs da briculis, gruês pai plantâs intal fondâl."

Continuìn la cjacarade:

a dî la veretât, su la barcje a jere un pôc fredut e si sintive un aiarin fresc di bore, ma al jere ancje un soreli tiepit che al scjaldàve il cûr e al bastave, ma no a ducj, parcè che si cjate simprichel che si lamente!

Cjalant di là su, al sameave di jessi in une tiere lontane, cence confîns, vignude su da aghe e ta aghe pronte a sparì: un mont vitâl e di vivarôs, ma cidìn e misterôs piardût intune galassie lontane. Nol sarès stât di meraveàsi a viodi salta fûr da cjanis cualchi marziàn dut vêrt, picinìn, plen di voi e di braçs.

Invezit da motonâf o vin viodût tantis robis gnovis, no tant strambis.

Ce voleso savê, fasenus vuatris des domandis, a ûs di chestis:

cemût èrie la aghe inte lagune?

Ce besteutis veso viodût?

Us rispuindìn a colp!

La aghe no si muoveve tant, a jere scure e si viondèvin velmis, bariduris e briculis metudis dai pescjadôrs.

Navigant, o vin viodût tantis besteutis che mai.

A jèrin i cocai che nus seguivin, svolazant intal cîl, i cormorâns a jèrin poâs su lis briculis a suiasi intal soreli.

I cesêns a metevin il cucl inte aghe par cirî di mangjâ e is svas, che a vevin un ciuf ridicul, si ribaltàvin come saltarins, nadant.

Di lontan o vin viodût ce tantis folagjs partî corînt sul fîl da aghe, liseris come plumis e su lis velmis a jèrin poas airôns e garzetis, a fasèvin ridi cun ches zatis lungjs e i becs in fûr.

Da cjanis di palût, spaurîs dal rumôr da barcje, a scjampàvin i masurîns, svolant in arie.

Al jère un bieòl viodi.

Ma la spiegaziòn da guide a jè pronte.

"Inte lagune o podìn viodi tancj uciei migradôrs, che rivin dal NORD EUROPE e chi a passin l' INVIER. Altris uciei, che van ancjemò plu a sud dal mont, si fèrmin inte lagune par polsâ e mangjâ.

Lis ocjs a fasin chistis lungjs migraziòns.

Altris uciei a vivin chi simpri.

Garzetis e airôns a cirin masanetis, plantant il lôr lunc bec intal pantan des velmis.

Il masurin si fâs cjalà pe sôs plumis coloradis, al è cussi biel, par tirâ dongje la femine, che invezit e à lis plumis sgrisuladis.

I cesêns a còvin insiemit i ûs e insiemit a fasin cressi i lôr piçui.

I cormorâns si butin inte aghe par cjapà i pêș, ma dopo e àn ce fâ par suasi lis plumis."

Nô fruts o cjalàvin atôr curiôs, intant la guide a continuave a cjacarâ:

"Inte lagune a vivin diviêrs pes, come il ceul, la pasare, il bisat. I pescjadôrs a fasin cressi ancje branzins e oradis siarâs intal mieç de aghe lagunâr."

Continuant la navigaziòn inte lagune, o vin viodût ancje i casons dai pescjadôrs e tantis plantûtis gnovis, mai viodudis prin.

E la guide nus à spiegât ben:

"Tant timp fa, i pescjadôrs e àn fat su i casons su lis isulutis. A jèrin fas di cjanis di palût. Dentre al jere il fogolâr di modôns e cuant che il fuc al jere piât, il fun al lave fûr pe cjanis dal tet, stant che no jere la nape. In che cjasutis al jere cjalt e cussì a sparagnavin lens.(Ancje al cincuant par cent).

In Istât su lis bariduris al sflurive il limonio colôr lille. Si puedin viodi ancje lis tamerici, arbui che resistin ancje te aghe salmastre."

Par continuâ la storie, o scugnìn dî che, finide la corse, in cime ta barcje tancj si lamentàvin, un al veve frêt, un al veve fam, un al veve sêt, un si lamentave di dut.

Alore o vin pensât di fermasi a Barbane.

Planc planc, la barcje a je rivade dongje de isule: si viodeve la tor blancje inta chel splaz poât intal mâr.

Alore la guide e à scomençât a spiegâ.

"Tant timp fa, une brute tampieste a veve algât dute la lagune.Si conte che lis aghis si son ritiradis e intune isule, mai viodude prin, e àn cjatât la statue de Madone.

Lì e àn fat un monasteri e il priôr si clamave Barbano e la isule e à cjapât il sô non.Di che volte tancj a van a preâ inte basiliche."

A Barbane o vin mangjât e bevût e si sin mos un pôc intal prât e inta stradutis, curint e ridint.

Daspò o sin montâs di gnûf su la motonâf, par tornâ a Grao.

Nô di cuarte si sin metûs sot, al cjaldût e o vin polsât fin tal moment di rivâ.

Podopo o sin lâs a gustâ e o sin tornâs a Percût.

Puedie finì cussì une storie? No, di sigûr! Si scugne inventâ un finâl.

Ma nô lu vin pront e par ultin us contìn ce che nus à sameât chest viaç.

Matteo I. "La gjite a je stade biele. Mi son plasûts tant i svas che zuiavin inte aghe."

Michael T. "Cjalant i casons, o ai pensât a cemût che vivevìn i pescjadôrs tai timps lontâns e mi sarès plasût jessi cun lôr."

Jacopo "A Barbane o vin viodût la statue da Madone e, ancje se le vevi za viodude, al è stât biel."

Aurora "Mi soi emozionade tal viodi tancj cesêns ducj insiemit."

Alice L. "Subit daspò co sin montâs su la barcje, o vevi pore, ma dopo o jeri contente."

Jonny "Al è stât maraveôs e straordenâri cjalâ tal cîl un cocâl intal binocol."

Giulia "Mi soi emozionade a vjodi li sbesteutis tal lôr ambient naturâl."

Samuele "Inte barcje o jeri content parcè che o varès viodût la lagune."

Mathias "In gjite mi sintivi une vore content parcè che no jeri mai stât in barcje."

Tomas "O ài viodût tantis besteutis: cocai, cesens, masurins, cormorâns e airons."

Sania "Ce biel passà denant di Barbane tal mieç de briculis."

Stefano "Ta che di o jeri malât, ma il mâr mi plâs, al samee piturât."

Massimiliano "La robe plui biele e jè stade viodi tancj animai, ma ancje le aghe che si moveve."

Tommaso "Jò o jeri malât, ma Grau mi plâs tant e d' Istât o voi ta aghe a cjapâ masanetis e pesûs!"

Thanat "Ancje iò o jeri malât, ma il mâr mi plâs in dut il mont."

Michael Z. "Mi vignive voe di fâ tantis fotos, par visami da velocitat e da bielege di dutis chês besteutis."

Marco "Cjalant Barbane o ài pensât a ce tante fature che varàn fat par costruî une glesie intune isule."

Kevin "La gjite a jè stade plene di emozions: ce biel viodi la aghe, il savalon, lis besteutis."

Anna "Mi è plasût dut: la barcje, il viaç, la lagune, il mâr."

Nicola "A jè stade une bielege escursiòn e jò no vevi mai viodût tancj svoladôrs e mi soi ingusât."

Matteo B. "No soi stât in gjite, ma il mâr mi plâs tant."

Elisa "Mi è plasût il zir parcè che o ài imparât robis gnovis su la nestre tiere."

Enrico "Inte gjite mi soi divertût un mont. Tornant indaûr, o pensavi che a jere stade une bielege zornade pasade insiemit ai mei amîs."

Helley "Passant sot dai puints, o sintivi tant aiar di mâr che mi faseve movi i cjavei."

Matilda "Mi soi emozionade cuant che la barcje a faseve lis curvis parcè che al sameave che colàs."

Alessandro "Grau a jè tant bielege: in rive al mâr si cjatin capis e inte aghe si cjatin masanetis."

Alice Z. "Ce bielege la lagune, ce biel il soreli e ce bielege la Basiliche di Barbane."

Cumò o scugnìn dî: **FIN!**



CESEN



CORMORAN



AIRON



**CJANIS DI
PALÛT**




MASURIN

BRICULE

BARIDURE





GARZETE


CASON

FOLAGJE

COCÂL

OCJE





BRANZIN

SEPE

GJAMBAR

PASARE

MASANETE



BARBANE